



### **Akileraartarnermut Aqutsisoqarfik**

Kalaallit Nunaannut nioqqutissanik eqquusuineramik nakkutilliineq Akileraartarnermut Aqutsisoqarfiup akisussaaffigaa. Nakkutilliinermi anguniarneqartoq ilaatigut tassaavoq haship Kalaallit Nunaannut eqqunneqartartup killilersimaarnissaa.

Immikkoortoq taanna isigineqarpoq nassuiaatitut UPA 2015/110-imut Naalakkersuisut nassuiaammik saqqummiussinissaannik pisussaaffilerneqarnissaannik Inatsisartuni aalajangiiffigisassatut siunnersuutaannut.

Naalakkersuisut siusinnerusukkut danskit naalakkersuisuinik isumaqatigiissuteqartarsimapput nioqqutissanik nakkutilliinermi suleqatigiinnissamik, isumaqatigiissutit illuatungeriinnut piunasaqaatitalik ikiuininnissamik nakkutilliinermi il.il. Akileraartarnermut Aqutsisoqarfiup nalilerpaa SKAT-ip Akileraartarnermut Aqutsisoqarfiullu akornanni suleqatigiinneq pitsaalluinnartut maannamullu annerusumik suleqatigiinnissaq pisariaqanngitsoq.

SKAT aamma Akileraartarnermut Aqutsisoqarfik 2015-imi nutaamik isumaqatigiissusiorput oqartussaaffiit tamarmiusut ataatsimut iluanni maannamut suleqatigiinneq taperniarlugu sukkanerusumillu suleqatigiinnerup annertusinissaa periarfissaqartikkumallugu.

Akileraartarnermut Aqutsisoqarfik maanna Island aamma savalimmiut killeqarfinni nunat akornanni nakkutilliinermi annertusisamik suleqatigiinniarlugit isumaqatigiinniarfigai. Taassuma saniatigut nunat akornini pisortatigut ataatsimiissutigineqarput ajornartorsiutaasinnaasut suleqatigiinnerlu ingerlaavartumik nalilersorneqarluni.

### **Iliusisissaq: mittarfinni nakkutilliineq annertunerusoq**

Mittarfinni nakkutilliisoqatigiit annertusaaviginissaat sivisuumik kissaatigineqarsimavoq. Ilanngaaserisut ikiaroorntulerisullu qimmii amerlanerit kissaatigineqarsimapput. Piffissap kingulliup ingerlanerani ilanngaaserisut marluk atorfinitsinneqarput ikiaroorntulerisullu qimmii marlunnik ilaneqassallutik. Ilanngaaserisup aappaa Kangerlussuarmi aalajangersimasumik inissisimassaaq. Akileraartarnermut Aqutsisoqarfik ullumikkut ilanngaaserisut ikiaroorntulerisullu qimmiinik pingasunik peqarpoq sulilu marlunnik ilaniarneqarput. Qimmip aappaa aamma



aningaasanik naamaarnermik sungiusagaassaaq. Taanna pingaarnertut inunnik nakkutilliinermi nioqutissanillu avataanut anninniarneqartunut atorneqassaaq.

#### **Iliusissat: Timimut scannerummik pisineq**

Timimut scannerut atorlugu timimi ikiaroorartunik peqarnerseq misissorneqarsinnaavoq, taamaattumillu mittarfinni nakkutilliinerup annertusarneqarnissaanut iluaqutaalluartaalluni. Scannerut atisat akimorlugit takutitsisinnaavoq, taamaalillunilu ikiaroorartunik atisani timimiluunniit toqqortanik ersersitsisinnaalluni. Timimut scannerut atorlugu akitsuuserisut politiillu inuk hashimik allanilluunniit eqqussinersoq ingerlaannartumik misissuisinnaapput. Timimut scannerummik atuineq assersuutigalugu Kangerlussuarmi angalasunik nakkutilliineq pitsaanerulersissavaa taamaasillunilu politiit peqqinnissaqarfiillu pigisaanik atorluaanerunissaq qulakkiissallugu.

Timimut scannerut assartuineq ilanngullugu 1.5 mio. kr.-inik akeqarpoq. Timimut scannerummik pisinissaq suli aallartinneqalinngilaq. Timimut scannerummut inatsisitigut tunngavigineqartoq nittarsaassisarneq aamma nalunaaqutsersuisarneq pillugu Inatsisartut inatsisaanni nr. 18 30/10 1992-imeersumi allanngortinneqartumi Inatsisartut inatsisaanni nr. 38, 9/12 2015-imeersumi nassaarineqarsinnaavoq.

Akileraarnermut Aqutsisoqarfik timimut scannerummik Kangerlussuarmi atuilerniarluni kissaateqarpoq, taamaasilluni paasissutissanik tassuuna aallersinnaaneq anguniarlugu. Pilersaarut imaappoq nunap mittarfiini nunanik allanik attaveqartuni timimut scannerummik peqalissaaq.

#### **Iliusissaq: Ikiaroorartunik suussusersiniarnermut atortussanik pitsaanerusunik pisineq**

Angalasut nassataannik nassiussanillu Kalaallit Nunaannut assartorneqartunik scannerisarnissaq pisariaqartinneqarpoq. Taama scannerinissamut maanna atortussanik peqarpoq, atortulli pitsaanerusunut kissaatigineqarput. Mittarfeqarfiit nassatanut scanneruteqarput. Illoqarfinni assartukkanik nakkutilliinerup annertusarneqarnissaa pisariaqartinneqarpoq. Sikuki<sup>4</sup> pissutigalugu pisariaqartitsineq annertunerusinnaavoq.

Atortunik mikinernik pingasunik -sisamanik pisinissaq kissaatigineqarpoq, taakku atorlugit ikiaroorartut katitigaanerit, tassunga ilanngullugit hashi ikiaroorartullu allat ingerlaannaq suussusersineqarsinnaallutik. Atortoq ataaseq 200.000 kr.-it missaannik akeqarpoq. Tamanna suli aningaasalersorneqanngilaq.

#### **Iliusissaq: akitsuuserisut angalanerulernissaat**

Nakkutilliinermik suliaqartut maanna unammilligassartaa tassaavoq aalaakkaasuunerat. Sinerissami, pingaartumik Kangerlussuarmi, Narsarsuarmi illoqarfinnilu anginerni misissuilluni sulinerup atitillugu ullumikkut angalaneq annertugisassaangilaq. Taamaattumillu akitsuuserisut angalanerulernissaat kissaatigineqarpoq. Iliuuseq malunnaatilimmik sunniuteqassappat akitsuuserisut, pingaartumik Kangerlussuarmut, Narsarsuarmut Ilulissanullu ukiumoortumik 300-eriarlutik angalasarnissaat pisariaqarpoq.

Taamaattumillu annertunerusumik iliuuseqartoqassappat nukissat amerlanerusariaqarput. Teknikikkut atortut siuliani taaneqartut saniatigut sulisut qimmillu amerlanerit

---

<sup>4</sup> Sikuki tassaavoq Nuummi umiarsualivik nutaaq containerersorluni umiarsualivimmi pisariillisaataasussaq pisariaqartitanillu nutaanik piviusunngortitsisussaq



atorfissaqartinneqassapput. Akitsuuserisumut qimmilimmut aningaasartuutit ukiumut 1 mio. kr.-it missaanniimmata paasissutissiissutigineqarsinnaavoq.